

REGIONAL NEWS BULLETIN

HEADLINES (MORNING)

- 1. Mizoram district 9-a Village Council leh Local Council inthlanpui chu thla thar, February ni 12 ah neih a ni dawn a, Model Code of Conduct pawh hman nghal a ni.
- 2. Village Council term pawh tawi chungchangah High Court chuan Mizoram sorkar insawifiah turin a hriattir.
- 3. Sawrkar laipui chuan a hnuai thawkte leh pensioner-te tan 8th Pay Commission a din dawn tih a puang.
- 4. Singapore President Tharman Shanmugaratnam chuan nizan khan Rashtrapati Bhavan-ah President Draupadi Murmu a kawm.

<><><>

VC/LC ELECTION

Mizoram district 9-a Village Council leh Local Council inthlanpui chu thla thar, February ni 12 ah neih a ni dawn a, Model Code of Conduct pawh hman nghal a ni.

A pisa a thuthar thehdarhtute hma ah niman khan State Election Commissioner Dr H Lalthlangliana chuan Autonomous District Council pathum huamechhung district pahnih, Lawngtlai leh Siaha district tih loh, district dang zawngah kumin 2025 February ni 12, Nilaini khian Village council leh Local council inthlanpui neih a ni dawn tih a puang a, heng district pakua ah hian Model Code of Conduct hman nghal a ni.

He inthlana chuh tum te tan tun thla January ni 23 tlai dar 3 thleng hming pek theih a ni ang a, February ni 12 zing dar 7 atanga tlai dar 4 thleng vote thlak a ni ang a, hemi zan vek hian vote chhiar a ni nghal dawn bawk a, February ni 14 ah VC leh LC sorkar din fel tur a ni bawk a ni.

(BYTE-SEC)

District 9-a Village Council leh Local Council term chu sorkar ruahman angin thla thar February ni 19 ah a tawp dawn a, State Election Commissioner Dr H Lalthlangliana chuan VC leh LC term pawh tawi leh pawh sei chu SEC thu nilovin sawrkar thu a ni a ti a, inthlan chu a term tawp hmaa neih tur a nih angin, SEC chuan inthlan hi a huaihawt mai dawn a ni a ti.

Inthlan neihna turah hian VC 544, awmah seat 2416 a awm a, Aizawl Municipal Corporation leh Lunglei Municipal Council hnuai LC 111 awmah seat 723 a awm a, a pumpui ah vote nei nuai 4, sing 3, 9409 an awm a ni.

Tun tum LC leh VC inthlanah hian Village Council hnuai hmeichhe tana seat reserve 613 a awm a, Local Council-ah chuan hmeichhe seat 195 a awm a ni.

<><><>

AMVCA

Village Council term pawh tawi chungchangah High Court chuan Mizoram sorkar insawifiah turin a hriattir.

All Mizoram VC Association (AMVCA) President Pu K. Lalngaizuala chuan VC term pawhtawi chungchanga sorkar an khinna chu High Court in nilaini khan a ngaihtuah a, sorkar chu insawifiah turin a hriattir tih Akashvani a hrilh a. Pu K. Lalngaizuala chuan kar khat chhunga insawifiahna, counter affidavit thehlut tura High Court in sorkar a tih thu sawiin, hei hi January ni 23 aia tlai lova thehlut tura a tih thu leh tun thla ni 30-ah chuan an inkhinna hi chinfel a nih theihna turin High Court in ruahmanna a siam thu a sawi a ni.

AMVCA President chuan State Election Commission in VC/LC inthlan hun puang mahse, High Court thu chu a kal ngaia a kal reng dawn thu leh inthlan hun puan ni mah se High Court-ah VC ten hnehna an chan chuan inthlan theih a nih dawn loh thu a sawi a ni.

Puan tawh angin All Mizoram VC Association chuan an President Pu K. Lalngaizuala hmingin nikum November ni 21-a sorkarin VC term thla 6 a a pawhtawina order chu an khing mek a. Thubuai hi a tirah sorkar order hmasa khinna anga thehluh a nih avangin AMVCA chuan an hnukkir a. Sorkar order hnukung zawk khinna tur thehlut lehin thubuai ngaihtuah ni tura ruat tun thla ni 13 khan AMVCA chu dan ang taka register a nih loh avangin hemi ni vek hian an inhnukdawk leh a. A tuk, tun thla ni 14 khan thubuai hi an President hmingin an thehlut leh a, niman khan High Court chuan sorkar chu insawifiah turin a ti ta a ni.

<><><>

GOVERNOR

Gen Rtd Dr. Vijay Kumar Singh chu nimin khan Raj Bhavan Circular Lawn-ah Mizoram Governor 25-na ni tura lak luh a ni.

Governor lakluhna inkhawm hi Chief Secretary Khilli Ram Meena an kaihruiin Larsap Dr. Vijay Kumar Singh hi Gauhati High Court Chief Justice Vijay Bishnoi an Mizoram rinawmna thu tiam tirin a la lut a ni.

Larsap lakluhna inkhawmah hian Chief Minister Pu Lalduhoma, Assembly Speaker Pu Lalbiakzama, Leader of Opposition Pu Lalchhandama Ralte leh minister dangte bakah Chief Minister hlui pahnih Pu Zoramthanga leh Pu Lal Thanhawla te pawh telin MLA hrang hrang an tel a, Rajya Sabha MP Pu K. Vanlalvena leh Lok Sabha MP Pu Richard Vanlalhmangaiha bakah tlawmngai pawl hruaitu hrang hrang leh sawrkar mi pawimawh an tel bawk.

Pu VK Singh-a hi a nupui Pi Bharti Singh nen nilaini khan Lengpui Airport lo thlengin, Chief Minister Pu Lalduhoma chuan Lengpui Airport-ah anmahni lawmna leh hmuahna hun a buatsaih a, lawmluhna hun zawhah hian Larsap hian Assam Rifles hotute a kawm a ni.

<><><>

INDUSTRY MINISTER

Commerce & Industries Minister Pu F. Rodinglana chuan Kawlkulh Handloom Pocket leh Ngopa Handloom Pocket huam chhunga puantah a eizawngte tan National Handloom Development Programme (NHDP) hnuai a Puantah In sak tanpuina puantah a eizawng mi 48-te hnen ah a hlan a.

NHDP hnuai a puantah insak tanpuina mi 48 te hnen ah hian first installment Rs. 50,000 theuh Minister hian a hlan a ni.

Pu F.Rodinglana chuan tanpuina dawngtute chu hmahlir thui tak nei turin leh hmalakna an kalpui dan tur uluk tak a chhut hmasa thin turin a fuih a. Hlawhtlinna lian zawk an chan theih nan Minister chuan mipui mamawh, duh zawng leh hralh nuam tur ngaihtuah tel turin leh an kutchhuakten hmun zau zawk a thlen theihna tur a ruahmanna siam thin a pawimawh thu a sawi. Tanpuina dawngtu Kawlkulh leh Ngopa Handloom Pocket huamchhung a puantahtute chu hmahatna an hmuhte a nih dan tur ang tak a hmang a, hmasawn puitu leh midang tan a entawntlak khawp a hlawhtinpuitu nih tum theuh turin a chah a. A huho a hmalakna sawt zawk kalpui thiam tur a thawhona leh tanrualna nei turin a fuih bawk a ni.

<><><>

KVK KOLASIB

Kolasib District Krishi Vigyan Kendra (KVK) leh Central Potato Research Institute (CPRI), Upper Shillong, Meghalaya-te tangkawp chuan an hnen atanga Alu chi dawng tawhte Training pein tunlai thiamna hmanga alu hlawk zawk leh tha zawka thar dante inzirtirna hun an hmang a. He hunah hian thlai chi sem chhuah nghal a ni bawk.

He hun hi Dr. Michelle C. Lallawmkimi, Senior Scientist & Head, KVK Kolasib in a kaihrui a. District Horticulture Officer Pu Lalnunpuia chuan a hmanpui a, Pu Lalnunpuia chuan Kolasib District a Loneitute chu Sawrkar Department bakah KVK leh ICAR a mithiamte'n an thutchilh chu an vanneih thu sawiin an thurawnte tha taka zawm zel turin a fuih a. Dr. Ngursangzuala Sailo, Senior Scientist (Plant Physiology), Central Potato Research Institute (CPRI), Shillong hnen atangin thusawi ngaihthlak a ni bawk.

He hunah hian Kolasib District-a khaw hrang hrang pariat (8) atangin loneitu sawmli (40) te an tel thei a. Pu PC Lalrintluanga, Subject Matter Specialist (Horticulture) lawmthu sawiin he hun hi a khar a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Wawin chawhnu dar 2 leh a chanve-ah Chanchintha hi puan leh a ni ang.

<><><>

8TH PAY COMMISSION

Sawrkar laipui chuan a hnuai thawkte leh pensioner-te tan 8th Pay Commission a din dawn tih a puang. Union I&B Minister Ashwini Vaishnaw chuan nimin khan New Delhi-a Union Cabinet thutlukna chungchanga chanchinbumite a kawmnaah he thu hi a puang a.

Union Minister Vaishnaw chuan tuna Pay Commission kal mek 7th Pay Commission chu kum 2026 ah a tawp dawn tih a sawi a. Tuna 8th pay Commission din anih avang hian ruahmanna siam turin hun a ngah dawn a ti a. Chairman leh Commission member turte pawh hun reiloteah ruat an ni ang a ti bawk.

Prime Minister Narendra Modia chuan 8th Pay Commission chuan mipuite nunphung a tihchangan tur thu leh lei leh hralh lam a tichak dawn a ti a. Sawrkar laipui hnuai thawk zawng zawngte Viksit Bharat thlentir tura an thawhnaah lawmthu a sawi a ni.

Union Cabinet thutlukna hian sawrkar laipui hnuai thawk mi nuai 45 chuang leh pensioer nuai 68 chuangte tan hamthatna a siam thei dawn a ni.

<><><>

SINGAPORE PRESIDENT

Singapore President Tharman Shanmugaratnam chuan nizan khan Rashtrapati Bhavan-ah President Draupadi Murmu a kawm a. India leh Singapore inlaichinna chungchanga thil pawimawh tak tak zau takin an sawi dun a ni. President pahnihte hian ram pahnih thawhdunnain kum 60 a tlin hriatrengna logo an tlangzarh bawk a ni.

Nimin khan President Draupadi Murmu-i khan Rashtrapati Bhavan-ah Singapore President Tharman Shanmugaratnam lo lawmna inkhawm a buatsaih a. He hunah hian Prime Minister Narendra Modia pawh a tel a ni.

President Shanmugaratnam chuan chancihnbumite kawmin India leh Singapore te chuan an inlaichinna ti hmasawn turin hmalakna thar an nei chho tih sawiin nikuma Prime Minister Modia'n Singapore a tlawh tum khan puan a ni a ti a. Ram pahnihte chuan hmasawna tluantling leh digital space lamah thhawhdunna tihlen zel an rel a ti bawk a ni.

<><><>

MAOIST

Chhatisgarh-ah security Force ten Maoist 12 an kaphlum. Nimin khan South Bastar huamchung Bijapur district-a Telangana nen an inrina lai ramngawah Moaist leh security force te an inkap a. Helai chhehvelah hian Central Reserve Police Force, Cobra Battalion, leh District Reserve Guard ten an thudawn bawhzuiin Maoist dapchhuah hna hi an thawk a. Bastar Inspector General of Police leh CRPF IG ten beihpui thlak hi uluk takin an vil a ni.

<><><>

PM MANN KI BAAT

Prime Minister Narendra Modi chuan tun thla ni 19 Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 118-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>